



*Jumat, 19 April 2024*  
**Ogen : 1 Petrus 1:7-9**



**Isepuh Gelah Ermurnina**



**K**imawen nungkun kita engkai maka kenca rembak ras Tuhan tempa-tempa geluhta reh susahna, tantangan reh buena dingen perbeben la erngadi-ngadi. Penungkunen si bagenda rupa la sekalak dua kalak ngenca sinurikenca. Ertina, banci jadi enterem kita si muniken penungkunen e i bas pusuhta. Jawaban si megati sialoken adi reh percuban i bas geluhta, e me perban lit dosanta. Lit perpayona, tapi labo kerina bage. Adi si ukuri terdauhen, kalak si sekolah nge maka kenca proses belajar piga-piga waktu dekahna, maka pemetehna ndai iuji, arah sada ujin bas sekolah. Ujin e wajib ilakoken erkiteken e kari ncidahken ntah kin si dat pelajaren e ntah lang. Kenca si e adi lulus si masuka ka pelajaren si terganjangan jenari seh ka me wari ujin, bage-bage lalap seh asa kita tamat erlajar. Adi tutus ateta, si ikuti pembelajarena, sialoken ujin e, erlajarka arah kesalahen si ndube banci jadi lulus kita alu nilai si memuasken.

Bage me kita enda ndalani kerna kegeluhen pertendinta e, desken sekalak murid i sekolah Kristus. Kenca kita jadi sikerajangenna, kita memasuki sekolah kegeluhen e. I ja kita ididik guna tek ras iuji kerna kinitekenta e. Dilaki ntah diberu kerina iuji. Kualitas kintekennta iandingken desken sada kantong teh, reh melasna launa, reh garana warnana, reh ernanamna tehna. Adi mberngeh nge bahan launa, labo teridah mejile rupana. Reh teridahna kinitekenta ras ernanam man sekelewet tupung lit tantangan si mesangat nderpa kita. Adi biasa-biasa nge kegeluhennta banci saja labo teridah buah kiniteken e. Ula mbiar nandangi percuban. Sangap saja siakap banta, sabap adi lulus kita sialoken me rudang-rudang kegeluhen tanda kemenangenta. *Sebanyak apapun kita di bakar oleh api pengujian, emas murni akan semakin bersinar.*

✎ *Emas si murni, itutung reh caharna*